

摩登伽經卷上

慶三

吳沙門竺律炎共優婆塞文謨譯

度性女品第一

如是我聞一時佛在舍衛國祇樹給孤獨園與諸比丘圍繞說法於晨朝時尊者阿難著衣持鉢入城乞食分衛已訖還祇洹林於其路次有一大池聚落人衆遊集其上池側有女旃陀羅種執持瓶器始來取水長老阿難往到其所語言姊妹今我渴乏甚欲須飲見惠少水真是時施女言大德我無所惜但吾

身是旃陀羅女若相施者恐非所宜阿難言姊我名沙門其心平等豪貴下劣觀無異相但時見施不宜久留時彼女人即以淨水授與阿難阿難飲訖還其所止其去已後此女便取阿難容貌音聲語言威儀等相深生染著欲心猛盛作是念言若使我得向去比丘以爲夫者不亦善乎復作是念我母善呪或能令彼來爲吾夫我當向母具宣斯事時此女人持水還家詣其母所而作是言阿難比丘是佛弟子我甚愛樂欲得爲夫如母力者

能辦斯事唯願哀愍必滿我願母語女言有  
二種人雖加呪術無如之何何者爲二一者  
斷欲二是死人自餘之者吾能調伏沙門瞿  
曇威德高遠波斯匿王極生信敬若脫知我

將阿難來旃陀羅輩皆被殘滅且復瞿曇煩

惱已盡及其眷屬咸離欲穢我昔曾聞斷生

死者宜加恭敬如何於彼反起惡業女聞是  
已悲泣而言若母不得阿難來者我必定當

棄捨身命假令瞿曇而違我願亦復不能久  
留於世設得之者衆願滿足母聞斯言慘然

不悅而告之曰莫便捨命我必能令阿難至  
此爾時女母於自舍內牛糞塗地布以白茅  
於此場中然大猛火百有八枚妙遇迦花誦  
呪一周輒以一莖投之火中其呪言曰

阿磨利 毘磨利 鳩鳩彌 三磨禰 移

那婆頭賜 頻頭彌車養 提菩跋利沙

提毗地踰多 提揭闍提 毘三摩耶 磨

羅闍三磨提

跋陀夷闍

若天若魔若乳闍婆火神地神聞我是呪及  
吾祠祀宜應急今阿難至此作是語已尊者

阿難心即迷亂不自覺知便行往詣旃陀羅舍爾時女母遙見阿難安詳而來告其女曰阿難比丘已來近此汝今應當敷置茵蓐燒香散華極令嚴淨女聞母言歡喜踊悅莊飾堂閣安置寶座淨治灑掃散衆名華爾時阿難既到其舍悲咽哽塞泣淚而言我何薄祐遇斯苦難大悲世尊寧不垂愍加威護念令無妨害爾時如來以淨天眼觀見阿難爲彼女人之所惑亂爲擁護故即說呪曰悉梯帝 阿朱帝 阿尼帝

於是世尊說此呪已而作是言吾以斯呪安隱一切怖畏衆生亦欲利安諸苦惱者若有衆生無歸依處我當爲作真實歸依爾時世尊復說偈言

戒池清涼淨無垢 能浴衆生煩惱熱

若有智者入此池 無明闇障永滅盡

度三

是故三世諸賢聖 咸皆頂戴共稱歎

若我真實浴此流 當令侍者速還反

爾時阿難以佛神力及善根力旃陀羅呪無所能爲即出其舍還祇洹林時彼女人見阿

難歸白其母言比丘去矣母告之曰沙門瞿曇必以威力而護念之是故能令吾呪斷壞女白母言沙門瞿曇其神德力能勝母耶母語文言沙門瞿曇其德淵廣非是吾力所可爲比假令一切世間衆生所有呪術彼若發念皆悉斷滅永無遺餘其有所作無能障礙以是因緣當知彼力爲無有上爾時阿難徃詣佛所頭面禮足在一面立佛告阿難有六句呪其力殊勝悉皆擁護一切衆生能滅邪道斷諸災患汝今宜可受持讀誦用自利益

亦安樂人若比丘比丘尼優婆塞優婆夷欲利安已饒益衆生皆當受持六句神呪阿難此呪皆爲過去六佛所共宣說今我釋迦牟尼三藐三佛陀亦說是呪大梵天王釋提桓因四天王等皆悉恭敬受持讀誦是故汝今宜加修習讚歎供養無令忘失即說呪曰  
耶頭多 安荼利 般荼利 枳由利 陀彌曷賜帝 薩羅姑利 毗槃頭摩帝 大羅毗沙 脂利 彌利 婆臘隣陀耶陀三跋兜 羅布羅波底 迦談必羅耶

佛告阿難若有衆生受持如是六句神呪臨應刑戮以呪力故輕被鞭撻而得免脫若當鞭撻此呪因緣訶責得免若應訶責由此神呪威德力故永無訶毀坦然歡樂阿難我不見沙門婆羅門若天魔梵人及非人受持此

卷三  
四

呪而被燒害唯除定業無如之何旃陀羅女於夜過已沐浴其身著新淨衣首戴花鬘塗香嚴飾金銀環珮瓔珞其體徐步安詳向舍衛國到城門已住待阿難阿難晨朝入城乞食女見其來深生歡喜隨之而行終不捨離

進止出入恒隨逐之尊者阿難見如是事極懷慚愧憂慘不悅還出城外至祇洹林頂禮佛足却坐一面白佛言世尊旃陀羅女極燒逼我行住進止而不捨離唯願世尊慈加擁護佛告阿難汝莫愁惱吾當令汝得免斯難爾時世尊告女人曰汝用阿難以爲夫耶女言瞿曇實如聖教佛言善女婚姻之法須白父母汝今爲問所尊未耶答言瞿曇父母聽我故來至此佛言若汝父母已相聽許可使自來躬見付授女聞斯言禮佛而退向父母

所修敬已畢却住一面白父母言我欲阿難以用爲夫唯願垂愍與我俱往親自付之於是父母往詣佛所頂禮佛足在一面坐女言瞿曇吾親已至爾時世尊即問之曰汝實以女與阿難耶答言世尊誠如聖教佛言汝今便可還歸所止時女父母禮佛而退於是如來告女人曰若汝欲得阿難比丘以爲夫者宜應出家學其容飾答曰雖然敬承尊教佛言善來便成沙門鬢髮自落法衣在身即爲說法示教利喜所謂施論戒論生天之論欲

爲不淨出要最善又此欲者衆苦積聚其味至少過患甚多譬如飛蛾爲愚癡故投身猛燄而自燒害凡夫顛倒妄生染著爲渴愛所逼如逐焰之蛾是故智者捨而遠之未曾暫起愛樂之想時比丘尼聞說是已心喜悅豫意轉調伏爾時世尊知比丘尼心意柔軟離諸惱障即爲廣說四真諦法所謂是苦是苦集是苦滅是苦滅道時比丘尼豁然意解悟四聖諦譬如新淨白疊易受染色即於座上得羅漢道更不退轉不隨他教頂禮佛足白

佛言世尊我先愚癡欲酒所醉擾亂賢聖造不善業唯願世尊聽我懺悔佛言我已受汝懺悔汝今當知佛世難遇人身難得解脫生死得阿羅漢亦爲甚難如斯難事汝已得之於佛法中獲真實果所謂生死已盡梵行已立所作已辦不受後有是故汝今宜應精進慎莫放逸

明徃緣品第二

爾時城中諸婆羅門長者居士聞佛度於旃陀羅女出家爲道咸生嫌忿而作是言此下

賤種云何當與諸四部衆同修梵行云何當入諸豪貴家受於供養如是展轉共議斯事乃至聞於波斯匿王王聞是已極大驚愕即便嚴駕眷屬圍繞前後導從詣祇洹林下車去蓋徐步而進頂禮佛足退坐一面佛知衆會心之所念欲決所疑告諸比丘汝等欲聞本性比丘尼徃昔緣不諸比丘言唯然欲聞汝今諦聽當爲汝說諸比丘乃徃過去阿僧祇劫於恒河側有園名曰阿提目多華果繁茂池流具足園中有王名帝勝伽是旃陀羅

摩登伽種與百千萬旃陀羅衆共住此園諸比丘彼帝勝伽有大智慧高才勇猛自識宿命世所為事無不通達我當略說其五功德一者博練四圍陀典祕密之要無不了達二者善解詩書文頌字句長短三者悉知諸論經紀度聲彼岸四者能解世俗祠祀呪術醫藥五者善分別大丈夫相如是智慧不可窮盡其王有子名師子耳顏容端正戒行清潔登伽王廣教其子經書呪術已所知者悉教

授之故師子耳知見深遠亦如其父等無有異帝勝伽王於夜卧中忽生是念我子色貌最爲殊勝衆德具足人所宗仰年漸長大宜爲娉妻必當選擇端正良匹才德超絕顏如吾子然後乃當而爲求之當是時也有婆羅門名蓮華寶宗族高美父母真正七世以來淨而無雜通四圍陀才藝寡匹時有國王名曰火與總領天下威力自在以一聚落封蓮華寶令其統御其土豐盛人民殷富彼蓮華寶女名本性德貌殊勝猶師子耳帝勝伽王

作是念言唯蓮華實其女殊妙吾當爲子而求娉之作是念已至明清旦乘大寶車駕駒白馬旃陀羅衆前後圍遶出家北行往趣其國時蓮華實所住處南有一園苑名曰悅樂花果滋茂樹木敷榮泉流浴池淨水盈滿異類衆鳥遊戲其上哀音相和聞者歡悅其園廣博甚可愛樂猶如諸天難陀之園摩登伽王徃彼園中待蓮華實時波羅門亦於晨朝駕駒白馬及與五百婆羅門俱導從圍繞至園遊觀彼婆羅門於其路次教授弟子技藝

等事且行誦習而來諸園帝勝伽王見蓮華實安詳而來威德殊特心生歡喜以偈讚曰如日初出光明照曜大士威德亦復如是如雪山藥衆藥中勝仁者高遠更無能比德力深妙極爲嚴顯猶如秋月衆星中最如梵天王智慧超勝悉爲諸天所共瞻仰如天帝釋一切恭敬端嚴殊絕更無能踰我但略讚汝之功德若廣說者不可窮盡說是偈已即起奉迎更相慰問然後就座蓮花實言汝旃陀羅下劣之甚而來至此欲何

所爲答言仁者世有四事宜應修習何等爲  
四一者本所爲事憶而不忘二者應當利安  
於已三者饒益一切衆生四者務修婚姻之  
事是以我今故來相造吾有一子名師子耳  
慶三顏容瓊瑋智慧微妙欲爲婢妻仁女賢勝意  
甚相貪欲託姻媛幸能垂意而見許可時蓮  
華寶聞是語已瞋毒熾盛極生忿恚顏容慘  
結色貌顰蹙而語之言摩登伽種人所輕賤  
甚可畏惡如毒如火我今身是婆羅門姓豪  
勝尊貴更無過者通達圓陀智慧無比汝今

云何欲來毀辱如空中月螢燭光明有目之  
士咸知其異旃陀羅種比婆羅門尊貴卑劣  
亦復如是今汝愚癡不識貴賤不可求處生  
心慚望汝旃陀羅自有種類何故欲染清勝  
之人且婆羅門戒行不具不能通達圓陀妙  
典諸婆羅門不與交遊況汝凡賤乃生是意  
急可速去不宜久留莫使外人聞斯異言時  
帝勝伽聞是事已語言仁者金玉珍異土木  
弊惡貴賤異相一切悉知我今不見諸婆羅  
門與旃陀羅而有差別何以故汝婆羅門不

從空出真陀羅種獨因地生婆羅門者從胎而有真陀羅種亦復如是而言殊勝是事不可婆羅門死人所畏惡真陀羅終亦無欲見若言貴賤而有相異何故生死而無差別汝意當謂旃陀羅者卷三造作惡事兇暴殘害欺詐衆生無慈愍心以是因緣名爲卑賤我當說汝婆羅門所有惡業虛妄之事起於諍訟擾亂賢善造爲妖恠占星觀月和合軍陣殺害衆生舉要言之一切惡事皆婆羅門之所爲作汝婆羅門性嗜美味而作是言若祠祀者

呪羊殺之羊必生天若使呪之便生天者汝今何故不自呪身殺以祠祀求生天耶何故不呪父母知識妻子眷屬而盡屠害使之生天不滅己身但殺羊者當知皆是諸婆羅門欲食肉故妄爲是說虛欺之人而言尊勝於理不可婆羅門法犯四種罪名爲極惡非婆羅門何等爲四一者殺害諸婆羅門二姪師妻三者盜金四者飲酒唯此四惡名之爲罪自餘殺害都無果報而汝法中得殺罪者由斷他命若殺餘人亦名斷命何故殺之而獨

無罪乃至飲酒亦復如是當知汝等愚癡無智橫生妄想不可以此名爲豪貴又婆羅門犯前四罪至心懺悔還可得滅手持床足著弊壞衣以人觸體懸其首上如是懺悔滿十二年戒還具足成婆羅門如是愚癡隨逐邪見而生嬌慢自謂尊豪由是觀之姓皆平等可以仁文見與吾子時蓮花實聞是語已倍增瞋恚語帝勝伽汝不思惟妄作是語汝爲王者應知三法一國土法二貴賤法三貢稅法世有四姓皆從梵生婆羅門者從梵口生

刹利肩生毗舍臍生首陀足生以是義故婆羅門者最爲尊貴得畜四妻刹利三妻毗舍二妻首陀一妻如是分別種姓各異汝自卑賤乃至不入是四姓中而言諸姓無有異相違反聖教欲擾亂我可宜速還莫得復語帝勝伽言仁者若說世四姓者皆從梵生而婆羅門獨從口出是以最尊更無過者諸婆羅門何故亦有手足支節及四威儀音聲語言以此因緣知無異相假令異者應當分別譬言如蓮花有種種異所謂水陸生華優鉢羅華

卷三

十

瞻蓄香華目多伽華蘇曼那華如是等華其色差別香氣亦異而汝四姓不見異相當知皆是妄想分別譬如小兒於路遊戲收聚沙土以爲城舍或復名曰是金是銀酥酪米麥而是沙土不以小兒名因緣故便成珍寶汝亦如是愚癡蔽心起貢高想尊貴下賤不由汝言即便成就又婆羅門梵口生者應當慈忍仁愛衆生云何殺害呪詛瞋忿假令四姓皆從梵生即爲兄弟云何共爲婚姻之事濁亂違理禽獸無別一切衆生隨業善惡而受

果報所謂端正醜陋貧賤富貴壽命終夭愚癡智慧如此等事從業而有若梵天生皆應同等何因緣故如是差別又汝法中自在天者造於世界頭以爲天足成爲地目爲日月腹爲虛空髮爲草木流淚成河衆骨爲山大  
腹小便利盡成於海斯等皆是汝婆羅門妄爲此說夫世界者由衆生業而得成立何有梵天能辦斯事汝等癡蔽橫生妄想而言尊勝人無信受又婆羅門命終已後獨得生天餘不生者是則爲勝而汝經中修行善業皆生

天上若修善業便生天者一切衆生悉能行  
善皆當生天何故餘人而獨卑劣大婆羅門  
譬如有人生育四子各爲立字一名安樂二  
曰長壽三名無憂四名歡喜雖一父所生皆  
同一姓而有四名差別之異世間四姓亦復  
如是雖同業報煩惱性欲而有四名言婆羅  
門乃至刹利毗舍首陀名雖不同體無貴賤  
諸婆羅門學園陀典恭敬尊重恃生憍慢而  
復因之以爲定性我今當說此園陀典無有  
實義易可離散昔者有人名爲梵天修學禪

道有大知見造一園陀流布教化其後有仙  
名曰白淨出興于世造四園陀一者讚誦二  
者祭祀三者歌詠四者禳災次復更有一婆  
羅門名曰弗沙其弟子衆二十有五於一園  
陀廣分別之即便復爲二十五分次復更有  
一婆羅門名曰鸚鵡變一園陀爲十八次復  
更有一婆羅門名爲善道其弟子衆二十有  
一亦變園陀爲二十一分次復更有一婆羅  
門名曰鳩杖變一園陀以爲二分二變爲四  
四變爲八八變爲十如是展轉凡千二百十

有六種是故當知園陀經典易可變易大婆羅門此園陀典當分散時婆羅門性爲隨散壞當猶存耶若令猶存則不應言諸婆羅門因園陀故性得決定設隨散壞汝云何言婆羅門性真寶不變是故汝說我獨尊貴餘人卑劣是事不然又婆羅門自恃智慧善能呪術輕憐他人生豪貴想然今汝等所能知者餘人學習亦得通達當知一切皆悉尊貴何故獨稱婆羅門耶過去有仙名婆私吒其妻即是真陀羅女產生二子長名爲純二名爲

飲皆獲仙道五通具足變園陀典作宅圖法汝能詬謗此二聖人言非仙耶而汝先言真陀羅種卑賤下劣何故其息名爲仙乎昔捕魚師捕得一魚剖腹而觀見有一女其色正黑波羅勢仙與共交會生育一子名提婆延五通自在威德具足如斯等比豈非仙耶過去久遠有刹利種名曰毗摩亦獲仙道神力殊勝智慧深遠善於言辭悉能教授諸婆羅門若斯之人寧當下賤有刹利女名曰微塵從婆羅門調婆持尼生育一子名曰羅摩有

大神力通諸經論於盛夏月共母遊行日光

焰熾大地斯熱曝其母足不能前進羅摩白

言上我肩上然後可去母於爾時不納其語  
小復前行猶患地熱羅摩誓曰若我真實仁  
和孝敬當今此日自然隱沒作是語已日尋

度三

十三

不現母後採花花皆舍閑母告之曰汝今日

沒故花不敷即復誓言我若仁孝日當復出  
立語已訖日尋顯曜如是等仙非婆羅門神  
力變化不可限量豈可名爲下劣人耶以是  
因緣諸姓平等可以汝女用妻吾子財幣珍

異恣意相與

示真實品第三

爾時帝勝伽王語蓮華寶仁者善聽我當爲  
汝斷邪見網開真實路淨菩提道起人天行  
就汝法中有五祠法言斯祠者是涅槃因能  
生天上何者爲五一殺害人取脂用祭二者  
刑馬亦以脂祭三廣大祭四普聞祭五隨所  
欲祭此皆虛妄無有真實徒自疲勞長衆惡  
趣有八善法是真利益必得生天獲衆善報  
何等爲八一者正信二者修戒三廣行施四

樂智慧五常恭敬同梵行者六好多聞七者  
防護身口意業八常親近諸善知識如斯八  
事是清淨法一切衆生皆應修習前七法者  
悉皆從於善知識所而得聞之是故汝今應  
當與我共爲婚姻就吾修學如斯妙法勿生  
憍慢失此善利今我復當更爲汝說諸姓所  
起本末次第汝聞是已宜除貢高劫初成時  
諸衆生類悉能飛行光明殊勝餚餚美味嚴  
身之具自然而有無造作者其後福盡衆事  
消滅是時衆生便生種殖壘界分別生我人

想或復自恃田稼滋多輕憊餘人自言豪富  
由是緣故衆皆名之爲刹利種復有衆生不  
樂居家入於山林修學禪法著弊壞衣乞食  
濟命清身潔己奉修祠祀由斯因緣咸皆謂  
爲婆羅門種耕種墾殖畋獵漁捕行如此者  
名曰毗舍劫盜販賣無悲忍心如斯之等名  
首陀羅時復有人於路遊行其車破壞因便  
修治名摩登伽惟爲農作名曰田夫往來市  
肆名商賈者如是分別爲百千種而其所起  
真實無異但假施設爲立名字爲欲紀別諸

姓不同就婆羅門亦復分別所謂瞿曇猶子  
憍蹉憍尸迦婆私吒迦葉蔓茶毗如是七姓  
復各分別皆出十種第八名烟更無異姓汝  
婆羅門雖名一相而得分別劫初衆生亦復  
如是根本無異別爲多姓是故汝今應諦觀  
察爲法利故爲斷虛妄求真實故宜以貴女  
用妻吾子欲有所求必相滿願可速爲婚不  
宜久留

衆相問品第四

時蓮華實聞是語已生大歡喜得未曾有語

帝勝伽善哉仁者所說誠諦汝於往昔曾爲  
何等智慧言辭乃能若是修習何行成何功  
德惟願爲我廣宣分別帝勝伽言我念過去  
曾爲梵王或爲帝釋亦復曾爲淨蓋仙人爲  
婆羅門變一圍陀以爲四分於百千劫作轉  
輪聖王如是生處尊豪富貴於爾所時修習  
慈悲禪定智慧廣化衆生施作佛事蓮花實  
言仁者豈讀婆毗多羅神呪不耶答言曾讀  
汝今善聽吾當廣說此呪本末過去久遠阿  
僧祇劫我爲仙人名曰婆藪五通具足自在

無礙善修禪定智慧殊勝時有龍王名爲德  
又其王有女字曰黃頭容色姿美人相具足  
我見彼女起愛著心生此心故便失神通及  
禪定法深自悔責即說此呪而此呪者凡有  
三章二十一句復有三章惟有八句汝今善

聽吾當宣說

怛提他一唵二浮婆蘇婆三曰娑婆闍四婆  
利茹五拔瞿提婆六斯提磨提由那七婆羅  
提那八此即名爲婆羅門呢

唵一闍致羅二多波數浮埵三伽呵男四婆  
那摩失多五幹毗羅六怛多羅毗利多七婆  
禮提婆婆八失利尸締緘九薩闍男十憂波  
男十一婆羅陀嘶摩十二

此即名爲刹利神呪

唵一質多羅二摩醯帝三毗舍斤若四阿他  
婆斤若五遏陀多六婆羅毗那七

此即名爲毗舍神呪

唵一阿多波婆羅多波二示毗陀貪三婆利  
沙賒貳四波貰五陀貪六奢羅七

此即名爲首陀神呪  
唵

有形必有欲 有欲必有苦 若能離此慾  
定得梵天處

此即名爲梵天王婆毗羅呪

蓮華實言汝姓何等曰姓三無又問仁者汝  
原何出答曰元從水生汝師是誰答言吾師

名迦藍延汝宗族中誰爲勇健答曰我門族

中凡有三人最爲雄猛一名爲獨二曰爲屬  
三者名曰婆羅陀闍汝同師者爲是何人答

言贊詠又問贊詠爲有幾變答言六種汝母  
何姓答曰吾母姓婆羅設如是仁者吾之德  
行其事若此故我先說一切衆生貴賤不定  
雖有尊貴而爲惡者猶名下賤若卑賤人能  
爲善事便爲豪貴是故一切稱尊貴者由修  
善業不以種族名爲勝人汝既知已當除憍  
慢

說星圖品第五

爾時蓮華實問帝勝伽仁者豈知占星事不  
帝勝伽言大婆羅門過此祕要吾尚通達況

斯小事而不知耶汝當善聽吾今宣說星紀  
雖多要者其惟二十有八一名昴宿二名爲  
畢三名爲觜四名爲參五名爲井六名爲鬼  
七名爲柳八名爲星九名爲張第十名翼十  
一名軫十二名角十三名亢十四名氐十五  
度三十七  
名房十六名心十七名尾十八名箕十九名  
斗二十名牛二十一女二十二虛二十三危  
二十四室二十五壁二十六奎二十七婁二  
十八胃如是名爲二十八宿蓮華實言如此  
宿者爲有幾星形貌何類爲復幾時與月共

俱其所祭祠爲用何等何神主之有何等姓  
惟願仁者重爲分別帝勝伽言若欲聞者諦  
聽當說昴有六星形如散華於十二時與月  
俱行祭則用酪火神主之姓毗舍延畢有五  
星形如飛鴈於一日半與月共行麋肉以祭  
屬於梵王姓婆羅婆觜有三星形如鹿首於  
一日中與月共俱以果爲祭屬於月神即姓  
鹿氏參有一星一日及月須酥以祭係在日  
神姓則安氏井有二星形如人步惟於一日  
與月而俱祭必用蜜屬於歲星亦姓安氏鬼

有三星形如畫瓶一日與月而共同遊祭以桃花屬于歲星姓烏波若柳宿一星半日共月不相捨離祭之用乳屬於龍神因姓龍氏有此七宿在於東方其七星者五則顯現二星隱沒形如河曲一日及月胡麻祭之屬於鬼神姓賓伽羅張宿二星亦如人步於一日中與月俱行以果用祭其姓善氏即屬善神翼有二星形如人步於一日半共月而行鮫魚祭之屬婆伽神姓橋尸迦軫宿五星形如人手一日一夜共月俱行稗穀祭之姓奢摩

延屬呾吒神角有一星一日及月以華爲祭屬呾吒神姓質多延亢宿一星酥麥麩祭之一日及月屬呾吒神姓曰赤氏氏宿二星形如羊角於一日半共月俱行以華用祭屬於火神姓桑遮延麥三有此七宿在於南方房宿四星形類珠貫一日一夜與月共俱酒肉爲祭係於親神姓阿藍婆心宿三星其形如鳥一日及月粳米祭之屬天地神姓迦旃延尾有七星其形如歟十六一日一夜與月共俱果以祭之屬沙陀神姓迦旃延箕宿四星形如牛步

一日一夜而與月俱尼俱陀果以用爲祭屬於水神姓迦旃延斗有四星形如象步於一日半與月同行桃花祭之屬凶惡神姓伽羅延牛宿三星形如牛首一時與月而共同行不須祭祀屬於梵天姓於梵氏女有三星形如麪麥一日一夜共月而行鳥肉用祀屬毗紐神姓迦旃延有斯七宿在於西方虛有四星形如飛鳥一日一夜共月而俱豆糜爲祭屬婆藪神姓僑陳如危宿一星一日及月粳米爲祭屬平水神姓單荼延室有二星形如

人步一日一夜共月俱行血肉祠祀其宿屬在富單那神姓闍爛那壁宿二星形如人步一日一夜及月而行以肉祭之屬於善神姓陀闍延奎一大星自餘小者爲之輔翼形如半珪一日一夜共月而行酪飯以祭屬富沙神姓八殊氏婁宿二星形如馬首一日一夜共月俱行乳糜用祭胃有三星形如鼎足一日一夜共月而俱胡麻爲祭屬於閻神其姓拔伽有此七宿在於北方大婆羅門我已廣說二十八宿然此宿中有於六宿一日一夜

共月俱行所謂畢井氐翼斗壁之等復有五宿但於一日共月而俱一參二柳三亢四心五者名危惟有牛宿半日及月自餘盡皆一日一夜共月而行東方七宿初起於昴南方七宿初起於星西方七宿初起於房北方七宿初起於虛又此宿中七宿最勝張室氐箕房井及亢三宿凶惡參柳與胃四宿和善翼斗壁畢五宿柔弱女虛危心第五名尾五宿常定一觜二角三名七星四者爲柳五者名牛四宿速疾昴觜妻鬼而此諸宿共月合行

凡有三種一在月前二在月後三共月俱今當爲汝復說七曜日月熒惑歲星鎮星太白辰星是名爲七羅睺彗星通則爲九如是等名占星等事汝宜應當深諦觀察  
摩登伽經卷上

變三

二十

音釋

枚莫杯切箇也  
鬼切瓊瑞  
美大也切  
六切鑿塵  
不悅貌切  
墾口很切  
植常穢切  
剗普厚切判也  
詣音暴蒲木切  
詔音曝曬也  
如人怒切  
以贍體切  
殖蘇后切也

瓊瑞瓊公回切  
謂婚姻相連也  
鑿塵鑿毗賓切  
切蹙子